

Consillu Armânjloru

(Consillu Makedonarmânjloru)

Head Office: *Moscopoli / Voskopoje – Curceaua / Korce* – Po. Box 54, Korce, Albania

Donation : ALPHA BANK, Korce / Albania – “Keshili i Armuneve”

IBAN: AL16902411270121230004496263 SWIFT: CRBAALTR

www.makedonarman-council.org e-mail : info@makedonarman-council.org

23-li di Maiu

Dzuvua Natsiunalâ a Armânjloru

Aoa sh 106 anji, Amirâriljia Otomanâ, pritu Iradelu tsi lu-avea datâ tu atselu kiro, pricânushtea Armânamea ca mileti ahoryea. Aestâ pricânushteari ascutea tu migdani idheea di yiurtuseari a Dzuuâljei Natsiunali tu 23-li di Maiu, idhei cari – ti itia câ ampârtsarea a Makiduniljei la 1913 nu adutsea haraua shi-arihatea ashtiaptatâ ti ahtari yiurtuseari – nu fu dusâ ma ninti.

Diunôarâ cu amintarea a craturiloru natsiunali tu Balcanu, cându Armânjilji furâ agârshits di isturii, Iradelu avea armasâ, cama di tsindzâts di anji, mashî unu documentu istoricu tsi va s-eara di multu agârshitu cara s-nu-ahurhea minarea di xanadishtiaptari a Armânamiljei di-aua sh-cama di treidzâts di anji.

Tu anjlji ditu soni yiurtusearea a Dzuuâljei Natsiunali a Armânjloru agiumsi, tu craturli ditu Balcanu iu Armânjilji bâneadzâ, unu lucru di-aradhâ. Aestu factu va s-dzâcâ câ Armânjilji s-luyursescu unu **populu ahoryea**.

Yiurtusearea di adzâ a Dzuuâljei Natsiunali yini sâ spunâ a vâsiliiloru tu cari bânâmu câ Armânjilji suntu UNU POPULU, unâ mileti ahoryea, cu idyia limbâ, adets, culturâ, a s-hibâ câ isturia lj-ampârtsâ di vârnâ 100 di anji, fârâ sâ-lj ntreabâ. Limba, cultura sh-adetsli a loru ahorhea, potu sh-prindi s-bâneadzâ deadunu, cu atseali a cratlui iu s-amintarâ.

Consillu Armânjloru

(Consillu Makedonarmânjloru)

Head Office: *Moscopoli / Voskopoje – Curceaua / Korce – Po. Box 54, Korce, Albania*

Donation : ALPHA BANK, Korce / Albania – “Keshili i Armuneve”

IBAN: AL16902411270121230004496263 SWIFT: CRBAALTR

www.makedonarman-council.org e-mail : info@makedonarman-council.org

Dukinda câ amintarea di-ndrepturi easti unâ cali nica greuâ, Armânjilji luyursirâ câ easti ananghi di unu organismu, di unâ institutsiuni armâneascâ cari s-lâ hibâ unâ boatsi tsi, tu numa a membriloru a lui ljei, sh-tu idyiulu kiro, tu numa atsiloru Armânji cari minduescu, dukescu shi pistipsescu tu atsea tsi ari ahoryea identitatea a popullui a loru, institutsiuni cari s-ducâ dinintea a guverniloru shi-a organismiloru internatsiunali câftârli a loru. Sh-ashi s-thimiljusi, aoa sh-shasi anji, Consillu Armânjloru / Makedonarmânjloru cari, tu anjilji ditu soni, lo parti la multi conferentsi sh-forumuri internatsiunali di simasii iu spusi tu tsi catandasi, di nistrâxeari ti eta 21, bâneadzâ unu populu sh-unâ limbâ veaclji ditu Evropa.

Ashi cumu dzâtsea sh-anvitsatlu avstriacu, Karl-Markus Gauss, tu unlu ditu multili eseuri tsi li-ari anyrâpsitâ trâ catandisea Armânjloru, “...easti unu paradoxu, câ Armânjilji, crishtinijilji tsi alumtarâ trâ amintarea a statiloru natsiunali **crishtini** tu Balcanu, nu au adzâ, tu aesti stati natsiunali crishtini, ndrepturli tsi li-avea atumtsea, tu kirolu ali Amirâria Turcâ...”.

Trâ itia câ tuti câftârli-a loru suntu tinjisiti, andrupâti di nomuri evropeani sh-internatsiunali, Armânjilji agiumsirâ adzâ tu unu kiro cându tsiva nu mata poati ni s-lj-asparâ, ni sâ-lj toarnâ ditu calea ankisitâ.

Mashi cu unâ dukeari dealihea armâneascâ, vruts Armânji, mashi cu vreami unu ti-alantu sh-cu acâkiseari unu cu-alantu, mashi ashî va putemu s-ascutemu tu videalâ aestu amintaticu tsi Armânamea di multu kiro lu-ashteaptâ.

Tu numa a Biroului di Cumândâseari a Consillui a MakedonArmânjloru, voiu s-hâristusescu a tutoloru atselji Armânji duruts cari anu di anu facu copusu trâ tuti andridzerli ligati di yiurtusearea a dzuuâljei di 23-li di Maiu, **Dzuua Natsiunalâ a Armânjloru.**

Yiani Mantsu,
Prezidentu Consillu a MakedonArmânjloru

tu 23-li di Maiu 2011

(Bulitinu Infurmativu Nr. 29)